

Dove te porta l'imaginasion

Iera una volta, no se sa quando e dove, una putela de nome Darcy. La gaveva lunghi cavei neri e oci blu/verdi. La iera sai timida e sola. Ghe piaseva leger e la pasava i giorni imaginando de eser protagonista de tante storie.

Un giorno ghe ga parso de no sentir più el pavimento soto i pii, come se el sparisi. Una volta sveia, la se ga 'corto de eser in una camera mai vista prima. Ghe stava davanti una putela coi cavei blu e i oci grigi. „Te son sveia?“, la ga dito. „Chi te son?“ ga domandà Darcy. „Mi son Glace, e ti?“ „Darcy“ la ga risposto, domandando „Dove son?“. „No savaria dirte. Credo che semo in una specie de Mondo Paralelo, qua xe tuto pericoloso, con un mucio de creature magiche“ ga risposto Glace con voxe sai seria. Darcy, senza dir una parola, la ga fato solo un picio segno con la testa de gaver capì. Dopo un poco, le due ga comincià a andar torsolon senza saver dove, finché, tuto in un colpo, le xe stade bloccade da una strana forza. Qualchedun, drio i alberi, ga urlà: „Bloca Incantesimo!“ e finalmente le ga rivà a moverse. Dopo, una putela se ga presentà davanti de lore. La iera più alta dele altre, con i cavei arancion e i oci gialli. „Dovè star 'tente, mi son Orange, e voi?“ ga domandà la putela. „Mi son Glace, e ela xe Darcy“ ga risposto Glace. „Savè usar la magia?“ ga domandà Orange. Stando site, con la testa le ga fato segno de no. „Dovè imparar a adoperarla quanto prima, se volè restar vive“ la ga dito Orange, quasi predicandoghe. „Come fasemo?“ ga domandà Darcy. „Ve insegno mi!“ la ga risposto con un sorriso. Le se alenava ogni giorno. Darcy la podedeva crear buxi neri, tirar fulmini, svolar e corer più veloce del vento. Orange la podedeva bloccar le magie fate dei nemici, farli diventar orbi e far salti de gigante. Glace la saveva congelar le robe, aumentar la sua forza e veder volta i muri.

Un giorno, quando le se alenava, le tre putele le ga sentì un urlo e le xe corse per veder cosa succedeva. Due putele, una coi cavei rosi e i oci maron e l'altra con i cavei curti e verdi e i oci maron, le iera circondade de omini incapuciadi. Darcy, fasendo un buso nero, la li ga fati sparir. „Grazie, mi son Ruby“ ga dito la rossa. „Mi son Emy!“ ga dito la mula coi cavei verdi. „Mi son Darcy, lore xe Orange e Glace“ ga dito Darcy mostrandoghe le due amiche. „Come mai non ve gavè difeso?“ ga domandà Orange. „I ga blocà i nostri poteri“ ga risposto Emy. „Capiso. Blocca Incantesimo!“ Orange lega liberà. Ruby la ga fato partir una lingua de fogo, Emy ga fato crescer un albero. „Grazie“ ga dito Ruby con un sorriso. „Mule, per vegnirghe fora de 'sto mondo, dovemo sconfiger chi lo regna, anche se non savemo niente de lui“ la ga sontado. Dopo una lunga caminada e tanti alenamenti, le pute le xe rivade in una pianura piena de draghi. Ghe ne iera tanti, de ogni tipo e color, ma una roba iera sicura: iera unici e favolosi. „Andemo!“ ga dito Orange. „Ma mi voio un drago!“ se ga lamentà Darcy. „Darcy, sia seria“ ga dito Orange con un poco de fastidio. „Mi resto qua finché non gavarò el mio drago!“ ga risposto Darcy incrosando i brasi. Sbufando un poco, Orange ga dito „Va ben, ma non afesionarte tropo“. Guardandose torno, Darcy la gavisto un drago speciale, quasi trasparente. Dopo tanti tentativi la ga rivà domesticarlo. El iera grigio e blu coi oci gialli. Glacela ga deciso de cior un drago blu coi oci verdi, Ruby un drago rosso rubin coi oci

arancion, Emy un verde coi oci giall e Orange un bianco coi oci blu. Cavalcando i draghi, le putele le ga svolà fin a un castèl e le se ga intrufolà dentro de un buso sul teto. Dentro iera una paurosa creatura scheletrica con tre teste, tuta nera, che svolava in meso. Quela creatura mandava un mucio de maledizioni e Orange la doveva anularle quanto prima. Dopo un duro scontro, el mostro se ga disintegrà, lasando cascar una stela che mandava una luce rosa. Darky ga ciolto la stela, decidendo de meterla su un altàr dela sala. In quel momento se ga vèrto un grande portòn che gavesi riportà le putele a casa. Dopo gaver saludà i draghi e gaverse saludà tra lore, le cinque putele le ga traversà el porton, con le lagrime che ghe rigava el viso.

Darky se ga sveià e tuto pareva un sogno. Ma ela in cuor suo la saveva che no iera un sogno, ma un'avventura che no la dimenticarà mai. La se ga guardà el braso e la ga visto una cicatrice: D, G, O, R, E = Amiche Per Sempre.